



Alþýðusamband Íslands

Forsætisráðuneyti
Stjórnarráðshúsinu við Lækjartorg
101 Reykjavík

Reykjavík, 3. maí 2021
Tilvísun: 202105-0001

Sent í samráðsgátt

Efni: Mótun skuldbindinga íslenskra stjórnvalda í tengslum við þátttöku í átaksverkefni UN Women, Kynslóð jafnréttis

Vísað er til stefnuskjals aðgerðarhópsins í samráðsgátt stjórnvalda mál 101/2021. Alþýðusamband Íslands (ASÍ) fagnar þeirri metnaðarfullu vinnu sem nú fer fram á þessum vettvangi.

Samstillt átak, á slíkum víðtækum grunni, gegn kynbundnu ofbeldi hefur líklega aldrei verið brýnna en einmitt nú á tímum kórónufaraldursins. Á heimsvísu má greina óhugnanlega aukningu á ofbeldi í nánnum samböndum og stafrænni kynferðislegri áreitni sem tengist því hve margar konur eru bundnar heima við vegna samgöngutakmarkana og útgöngubanna. UN Women hefur einmitt nefnt þetta skuggafaraldur kórónuveirunnar.


Verkalýðshreyfingin hefur bent á að konur eru meirihluti þeirra sem starfa í svokölluðum framlínustörfum á tímum veirunnar, þ.e. starfsfólk í heilbrigðis- og félagsþjónustu, fræðslu, þjónustu og verslun, þar sem þær verða fyrir síauknu áreiti og hótunum af hálfu samborgara sinna. Við það bætist ógnin á smitum og almennt andlegt og líkamlegt álag. Þá hefur atvinnuleysi einnig bitnað harkalega á konum.

Alþjóðasamband verkalýðsfélaga (ITUC) kallar eftir því að ríki fullgildi samþykkt nr. 190 sem þing Alþjóðavinnuálastofnunarinnar (ILO) samþykkti. Samþykktinni er ætlað að vernda fólk gegn ofbeldi og áreitni í öllum myndum í heimi vinnunnar. Í samþykktinni er notast við víða skilgreiningu á „heimi vinnunnar“ með tilliti til þess að í dag fer vinna ekki alltaf fram á eiginlegum vinnustað. Skilgreiningin nær meðal annars yfir ofbeldi og áreitni í vinnutengdum ferðalögum, á leið í og úr vinnu, í húsnæði sem atvinnurekandi útvegar eða í vinnutengdum samskiptum, meðal annars þeim sem fara fram með hjálp upplýsinga- og samskiptatækni.

ASÍ tók þátt í gerð samþykktar nr. 190 um ofbeldi í heimi vinnunnar og hefur skorað á stjórnvöld að vinna markvisst að því að hún verði staðfest af Íslands hálfu og leggur nú jafnframt til að tillit verði tekið til samþykktarinnar í þessari vinnu sem nú fer fram í þessu aðgerðarbandalagi gegn kynbundnu ofbeldi.

Virðingarfyllst,

f.h. Alþýðusambands Íslands


Guðrún Margrét Guðmundsdóttir, sérfræðingur